

廿九日。以金登干处饱食，饮茶过多，颇觉不适，遂至竟夜不寐。邀马克里诊视，云脉息视前大减，虚症毕见。此间一无遂心之事，其势不能不病。夜睡不安，自六月初闻刘云生狂悖之言，遂有此症，殆非偶然也。新报极论中国赴法国赛奇会，始终赫德一人任之，国家并未一究心，以为中国于此有图前进之心，此语甚误。盖初赴奥国赛奇会，新报原有此语也。阅之慨叹而已。

## 十二月

十二月初一日辛巳。为西历正月初三日。接上海十月十八日由法国晏拿里公司船寄到第五十一号包封，内直督咨文二角，给发德国兵官宝星。又欧阳道庄一信，广东巡检也。并唐景星信及志城十月初三所发第十二信。自十一月二日接到九月六日所发第七信，距今一月，未接他书，而遽编列十二号，何也？知讷生物故，夔臣公一房衰微至此，可伤也。新报言，俄军已越土国巴尔铿山，踞有倭尔堪尼一城。往时俄人侵土，至阿德里亚城而后议和，人言此次仍袭旧迹为之，然土势益不支矣。英人用兵之议恐不能缓。或拒俄，或分土之南境以保苏尔士河，则尚须乘机为之，不能预定也。纽开士绅民上书国家，言色尔为<sup>①</sup>立国，英、奥两国实保护之。今俄人并未加兵色尔为，而色人乘土乱，与鲁美尼亚<sup>②</sup>相比，举兵攻土。是非但叛土，亦蔑视英、奥两国，宜兴问罪之师，而诘其所以动兵之意。国家下其书外部，亦尚未定议也。是夕仍不成寐，可惧之甚。

①色尔为，Servia（塞尔维亚）的音译。

②鲁美尼亚，Rumania（罗马尼亚）的音译。